

ADYAYA I

PURWAKA

1.1 Dadalan Pikobet

Pamlajahan basa Bali ring sekolah sampun kapolihang mawit saking SD kantos ring SMA. Ring SD kantos SMA, paplajahan indik basa kakepah dados petang kompetensi, sekadi mirengan (*Menyimak*), mabebaosan (*Berbicara*), ngwacen (*Membaca*), lan nyurat (*Menulis*). Ring aab jagat sekadi mangkin paplajahan basa Bali nenten meweh ring sisia santukan sampun kapolihang saking SD kantos SMA, punika mawinan bilih-bilih sampun wenten panyuluhan basa Bali sane nglaksanayang pamlajahan basa Bali ring Desa, sepatutnyane nenten wenten pikobet ngenenin indik pamlajahan basa Bali. Punika taler mangkin sampun wenten Peraturan Gubernur Bali nomor 80 warsa 2018 nlatarang indik *Pelindungan* miwah Pengangge basa, aksara, lan sastra Bali taler *penyelenggaraan bulan* basa Bali. Sakemaon kasujatiannyane ring aab jagate sekadi mangkin pamlajahan basa Bali kajerihang sajeroning ngwacen aksara Bali silih tunggilnyane ring SMP N 3 Abiansemal.

Sekolah SMP N 3 Abiansemal magenah ring Desa Sibangkaja, Abiansemal, Badung. Sadurungnyane praktiksa riin sane sampun nglaksanayang sadu wicara majeng ring guru basa Bali kelas VII, Ni Nyoman Sutini, S.Pd nlatarang ring pamargin pamlajahan ngwacen, tur pangresep ngwacen aksara Bali sisia durung karesep miwah pamlajahan ngwacen aksara Bali ngemedin. Saking pikobet-pikobet sane munggah ring ajeng manut pah-pahan saking kawentenan sane munggah ring wewidangan nyihnayang indik para sisia kantun wenten ring pah-pahan kaping kalih, inggih punika kahanan psikologis utamannyane ring *minat* miwah *motivasi*. Indike punika manut sakadi kawentenan sane munggah ring wewidangan pendidikan, sane nyihnayang indik para sisia kantun bingung indik ngwacen

sasuratan maaksara Bali. Manut para sisia ngwacen aksara Bali punika meweh pisan, punika mawinan ipun meweh ngapalang aksara miwah pangangge aksara punika miwah ipun kantun madue pepincu indik pamlajahan bahasa Bali, utamannyane ring pamlajahan ngwacen aksara Bali pinaka pamlajahan sane ngemedin. Nuek saking kawentenan pamlajahan nuntun pamargi guru inovatif miwah kreatif pastika makarya utawi nganggen *media* ri kala tetujon pamlajahan. Punika taler, metode pamlajahan sane anut mangda ngamolihang miwah nyiptayang galah sane becik ring kelas.

Pamlajahan *inovatif* miwah *kreatif* pinaka parindikan pendidikan sane polih pamlajahan inovatif miwah kreatif sane wenten ring kelas ring aab jagat mangkin. Punika mawinan soroh pendidikan puniki nganggen strategi, utawi usaha antuk mimcapang pikolih soang-soang punika prasida ngamolihang keberhasilan (Purnami, 2022). Punika patut kauratiang mangda prasida nganggen media utawi metode sane *inovatif* miwah *kreatif* sane prasida kalaksanayang ring kelas .

Wenten makudang-kudang tata cara utawi *media interaktif* sane prasida kaanggen olih guru ri kala ngajahin. Wenten *Media* pamlajahan sorohnyane sakadi *media visual*, *media audiovisual*, *media interaktif*, *media digital* (gambar), miwah sane tiosan (Purnami.,dkk, 2022) Wenten usaha sane prasida katataasin ring pikobet patut makarya teknik pangrancana pamlajahan ngwacen punika inovatif miwah sane jagi ngawigunayang *media* pamlajahan Monopoli Aksara Bali anggen natasin pikobet punika.

Media Pamlajahan nganggen Monopoli aksara Bali punika *media* sane kaanggen ring sajeroning pamlajahan ngwacen aksara Bali. Piranti sane kaanggen guru ri tatkala ngicenin paplajahan wantah buku kemanten. Indike punika taler sane dados pikobet sane mawinang panincapan pikolih ring pamlajahan punika durung maksimal. Panincapan pikolih pamlajahan punika nenten ja kacingak saking pikolih sisia manten, nanging guru sane pinaka kunci pikolih ring paplajahan punika. Manut (Ardalia lan Susilana, 2021) pangawigunayang *media* pamlajahan Monopoli aksara Bali sane

mabasis *visual* punika pacang ngawinang para sisia dangan ngresepang materi pamlajahan sane katlatarang olih guru lan sisia pacang nglaksanayang pula palih malajah maarti sareng wentennyanne *media* pamlajahan monopoli aksara Bali.

Sisia SMP punika kantun seneng maplalinan. Punika mawinan dadosne madue genah ngwentenang indik *media* sane prasida nincapang uratian sisia ri tatkala mlajahin indik pasang aksara Bali, utamanyane ring kawagedan ngwacen aksara Bali. Punika mawinan mautsaha ngwentenang *media* pamlajahan sane *inovatif* miwah *kreatif* manut ring kawentenan *emosional* sisia SMP sane kantun seneng maplalian. Ring PTK puniki jagi ngangen *Media* Pamlajahan punika marupa Monopoli aksara Bali. Manut (Sihotang, 2022) plalianan monopoli sekadi ring aab jagat sane sampun lintang inggih punika plalianan lumbrah ring tetilikan puniki, plalianan monopoli kaubah mangda anut kaanggen ri kala proses pamlajahan ngwacen aksara Bali. Punika mawinan kadaut pacang nganggen *media* pamlajahan puniki anggen ngajahin indik pasang aksara Bali. Dadosne pacang ngrubah gambar ring paplalianan monopoli punika.

Ring paplalianan monopoli mabasa Bali puniki, gambar- gambar sakadi menara Pissa, menara Eiffel, Dubai, miwah sane tiosan punika kagentosin antuk gambar pura-pura sane wenten ring Bali minakadi Pura Besakih, Lempuyang, Goa Lawah, Goa Gajah, miwah sane tiosan. Lianan punika ring gambar pura, genah-genah pariwisata minakadi Uluwatu, GWK, pasisi Kuta, pasisi Lovina, miwah sane tiosan taler kaanggen mangda para sisia kantun tampek ring kawentenan genah-genah punika sane pacang ngawinang sisia dangan ritatkala ngamargiang media pamlajahan monopoli mabasa Bali punika. Tata cara maplalianannyane tetep kaanggen, minakadi nganggen kalih dadu miwah bidak anggen mamargi. *Kartu kesempatan* miwah *dana umum* tetep kaanggen, nanging kagentosin antuk basa Bali. Paplalianan monopoli puniki prasida kamargiang olih 5 diri pemain. Sira

sane pinih akeh nyawis ring pamargin paplalianan, punika sane dados jayanti.

Punika prasida kacutetang *media* pamlajahan ngwacen anut sang ngicen imba wacana basa Bali ring sisia. Kaluwihan *media* pamlajahan Monopoli aksara Bali malianan sareng *media* pamlajahan sane lianan punika prasida ngicen panglimbak pikayun ring sisia ngwacen, nincapang pangresep mapauruk ngwacen aksara Bali miwah prasida katlaranag olih guru imbanyane mangda kauratiang imba punika majeng ring sisia. Kawigunan miwah kaluwihan, *media* puniki luwih pisan taler prasida kaanggen ring pamlajahan ngwacen aksara Bali.

Kawagedan ngwacen aksara Bali madue ius sane ageng ring pamlajahan sisia, sakadi utsawa ngwacen aksara Bali miwah muputang tugas sekolah ring pamlajahan ngwacen aksara Bali. *Media* pamlajahan aksara bali antuk kawacen olih sisia ring arep kelas. Sampun wenten tetilikan sadurungnyane sane ngawigunayang *media* pamlajahan monopoli aksara Bali inggih punika tetilikan saking (Paryatna., dkk, 2019) sane mamurda nincapang kawagedan ngwacen aksara Bali sisia kelas IVa Sd negeri 2 sakti Nusa Penida warsa 2018/2019 antuk *media* topik aksara Sane kasurat Nganggen Aplikasi Balinese Font and Keyboard. Pabinayan tetilikan puniki sareng tetilikan dumun inggih punika ring *objek* lan genah tetilikan. *Objek* miwah genah tetilikannyane inggih punika sisia kelas VII SMP N 3 Abiansemal, sane nganggen *media* pamlajahan Monopoli Aksara Bali.

Saking tetilikan ring ajeng, pacang ngawigunayang *media* pamlajahan monopoli aksara Bali anggen nincapang pangresep ngwacen aksara Bali. *Media* pamlajahan Monopoli aksara Bali dahat mabuat pisan kaanggen nincapang pangresep ngwacen aksara Bali anggen paweweh ring sisia antuk muputang pikobet-pikobet paplajahan ngwacen aksara Bali miwah nincapang pamlajahan ngwacen aksara Bali. Ngawigunayang *Media* pamlajahan monopoli aksara Bali puniki guru prasida nguningin pangresep

utawi kaiwangan-kaiwangan sisia. Panilik jagi ngawigunayang *media* pamlajahan Monopoli aksara Bali antuk nglaksanayang tetilikan sane mamurda “*Media* pamlajahan monopoli aksara Bali kaanggen nincapang pangresep ngwacen aksara Bali ring sisia kelas VII SMP N 3 Abiansemal”.

1.2 NGREREH PIKOBET

Sajeroning tetilikan, malarapan pikobet kapolihang punika antuk *media* pamlajahan Monopoli Aksara Bali mangda prasida nincapang pangresep sisia ngwacen aksara Bali. Pikobet sane kapolihang sakadi: (1) Sisia meweh ngresep ring pamlajahan ngwacen aksara Bali santukan guru wantah ngicenin materi sane wenten ring buku paplajahan, (2) Sisia durung prasida nyambungin teori sareng praktik santukan kirangnyane paiketan sisia, (3) Galah Pamlajahan kantun kirang ri kala pamlajahan ngwacen aksara Bali, (4) Sisia med ri kala paplajahan ngwacen aksara Bali, miwah (5) Guru punika durung ngawigunayang *media* pamlajahan. Sisia punika nenten seneng utawi nenten meled ri kala pamlajahan ngwacen aksara Bali ring sisia kelas VII SMP N 3 Abiansemal.

1.3 NGWATESIN PIKOBET

Ngwatesin pikobet punika wantah ngawigunayang *Media* pamlajahan Monopoli Aksara Bali kaanggen nincapang pangresep ngwacen aksara Bali ring sisia kelas VII SMP N 3 Abiansemal. Kawentenan ngangge *media* pamlajahan pikobet sane wenten ring pamlajahan mangda prasida katepasin, miwah panampen sisia ngangen *media* pamlajahan Monopoli Aksara Bali antuk nincapang pangresep ngwacen aksara Bali ring sisia kelas VII SMP N 3 Abiansemal.

1.4 BANTANG PIKOBET

Malarapan antuk dadalan pikobet ring ajeng, prasida karincikang bantang pikobet inggih punika :

1. Sapunapi pidabdab sajeroning paplajahan sane kamargiang guru ngawigunayang *Media* pamlajahan Monopoli Aksara Bali Kaanggen nincapang pangresep ngwacen aksara Bssali ring sisia kelas VII SMP N 3 Abiansemal?
2. Sapunapi *Media* pamlajahan Monopoli Aksara Bali prasida nincapang pangresep ngwacen aksara Bali ring sisia kelas VII SMP N 3 Abiansemal?
3. Sapunapi penampen sisia ring kawentenan *Media* pamlajahan Monopoli Aksara Bali Kaanggen nincapang pangresep ngwacen aksara Bali ring sisia kelas VII SMP N 3 Abiansemal?

1.5 TETUJON TETILIKAN

Malarapan antuk pikobet sane sampun karincikan ring ajeng, tetujon tetilikan puniki inggih punika:

1. Prasida Mahbahang pidabdab pamlajahan ngawigunayang *media* pamlajahan monopoli aksara Bali kaanggen nincapang pangresep ngwacen aksara Bali ring sisia kelas VII SMP N 3 Abiansemal.
2. Prasida Mahbahang sapunapi pawasana, panincapan pangresep ngwacen aksara Bali ngawigunayang *Media* pamlajahan Monopoli Aksara Bali kaanggen nincapang pangresep ngwacen aksara Bali ring sisia kelas VII SMP N 3 Abiansemal.
3. Prasida nyelehin panampen sisia ring kawentenan *Media* pamlajahan monopoli aksara Bali sane kaanggen nincapang pangresep ngwacen aksara Bali ring sisia kelas VII SMP N 3 Abiansemal.

1.6 KAWIGUNAN TETILIKAN

Kawigunan tetilikan sane mamurda *media* pamlajahan monopoli aksara Bali kaanggen nincapang pangresep ngwacen aksara Bali ring sisia kelas VII SMP N 3 Abiansemal:

1.6.1 Kawigunan Pamucuk

Pikolih tetilikan puniki kauratiang mangda mawiguna ring spanglimbakan widia utawi *teori* ngwacen aksara Bali sane nganggen *Media* pamlajahan Monopoli Aksara Bali miwah pangweruhan ring widia paguron (Ilmu Pendidikan), picutetnyane prasida ngamecikang utawi marimurnayang pamlajahan ngwacen aksara Bali.

1.6.2 Kawigunan Panglimbak

1.6.2.1 Majeng ring Sisia

Saking tetilikan puniki kaaptiang mangda madue pikolih punika anggen paweweh sisia antuk malajah ngwacen aksara Bali.

1.6.2.2 Majeng Ring Guru Basa Bali

Saking tetilikan puniki kaaptiang prasida nyarengin Guru basa Bali ring SMP N 3 Abiansemal sida nganggen *media* pamlajahan sane inovatif. Dadosnyane ngamolihang pikolih sane becik.

1.6.2.3 Majeng Ring Panilik Selanturnyane

Saking tetilikan puniki mangda prasida kaangen sepat siku-siku utawi sesuluh ring sajeroning tetilikan selanturnyane sane ngenenin pamlajahan aksara Bali.